

jedinice na objektima održavanja takmičenja i drugim mjestima organizacije Igara) funkcioniraju besprijekorno i da su i dalje validne pohvalne ocjene na 87. sesiji MOK-a kada je riječ o funkcionalnom aspektu organizacije Sarajevske olimpijade.

NOVE IDEJE GOSTIJU

Poneseni pozitivnim utiscima i ocjenama o dosadašnjem toku ZOI, mnogobrojni strani gosti, oficijalne ili počasne ličnosti svijeta, manifestaciju su počeli da gledaju i tumače sa mnogo širih razina svjetskih interesa kada je u pitanju olimpijski duh; kada su u pitanju sport i umjetnost u funkciji olimpizma u cjelini. Sarajevske dojmove i iskustva stavljali su u vezu sa univerzalnim, svjetskim ambicijama olimpijske ideje u savremenim uslovima.

Nekoliko članova Međunarodnog olimpijskog komiteta, na primjer, pokrenulo je inicijativu da Muzej XIV zimskih olimpijskih igara Sarajevo '84 postane ujedno i muzej svih zimskih olimpijskih igara. O ovoj sugestiji i nakani uglednih predstavnika svjetske olimpijske porodice portparol organizatora Igara obavještio je i zvanično mnogobrojne učesnike konferencije za štampu u „Skenderiji.”

U inicijativi je, kao posebno snažan argument njenih pokretača, kako je novinarima napomenuto, obrazloženo da se Sarajevo u vrijeme Olimpijskih igara potvrdilo na najbolji mogući način kao živ i osoben centar kulturnog života, što je u skladu sa Olimpijskom poveljom koja Igre ne kvalifikuje samo kao sportske, nego i kulturne događaje u humanističkoj funkciji zbližavanja naroda svijeta.

I ova vijest obišla je u petak svijet putem poštanske jedinice Glavnog press-centra kao rekordan dan u tom pogledu. Domaći i inostrani novinari su 1.170 puta telefonirali šaljući izvještaje u sve krajeve svijeta. Samo koji dan ranije novinari su imali kao dnevni rekord 700 telefonskih izvještaja preko ove centralne PTT mreže, a u prvih deset dana februara bilo je oko 4.500 izvještaja na sve kontinente.

GESTOVI HUMANOSTI

U poplavi olimpijskih novatorija i rekorda ovih dana po strani nisu ostavljeni ni invalidi-sportisti, kojima je, upravo u Sarajevu, međunarodna olimpijska porodica pružila mogućnost i šansu da na borilištima sarajevskih planina i dvorana iskažu svoje fizičke mogućnosti kao ravnopravni ljudi koji se ne zaboravljaju.

Loši vremenski uslovi na Jahorini, naime, nisu spriječili najbolje slalomaše-invalida da prvi put u istoriji nastupe u okviru jednog olimpijskog programa. Na stazi za olimpijski veleslalom za žene nastupilo je 29 takmičara iz deset zemalja.